

歷朝憲章類誌卷之十五

潘輝注著

官職誌

庶司職掌之殊上

黎仁宗延寧三年。旨諭大臣內外文武百官等。爲人臣當盡其職。大臣則左右厥辟。變理陰陽。進賢退不肖。以圖政治。諸衛管軍官。則撫恤軍士。練習武藝。不可私自差使。科斂擾害。侵損軍需。五道行遣等官。則建明便害。甄別善惡。民命政事。簿書獄訟。要處置得宜。不可徇私滅公。以傷治體。風憲官。則繩愆糾謬。激濁揚清。不可挾私論事。畏縮緘默。內密院則遵奉典憲。敷奏詳審。不得倚法行弊。有所要求。刑獄官則鞠對明白。伸冤理枉。務在得情。不可妄受囑托。賄賂以致沉滯冤濫。府路州縣等官。宜宣布德意。撫字部民。詞訟賦役。務要廉平。不可以貨媚事上司。以希進用。殿前殿後各局各庫等官。則嚴加檢納。不可廢公營私。乾沒侵蠹。學官則謹守學規。教訓諸生。務使成才。不可玩視歲月。廢弛學業。其各司局署等官。亦宜克勤厥事。不可怠惰僥倖。凡爾百官。各宜遵守奉行。

按自陳以前。職掌不可詳考。大要部院省局各有所司。但見於史者。簡略無徵。惟自黎而後。時加率作。職司各有所辨別。方可參考。徵證今故錄。自黎朝廷寧以降。繼以歷代訓飭之制。而從前可以類推云。

聖宗洪德二年。校定官制。諭曰。今之士字版章。視之昔時。大相逕庭。不得不躬制作之權。盡變通之道。內而軍衛之衆。則五府分掌之。機務之繁。則六部參綜之。禁兵府禦三司。以備爪牙心膂。六科審駁百司。六府承行庶務。通政使司。以宣上德。達下情。御史憲察。以糾官邪。灼民隱。外而十三承司。與



總兵方面都司守禦。控制要衝。府州縣以親民。堡所關以備禦。聯常事體。互相維持。故徵發督府事也。體統必關兵部。出納戶部職也。幫支必與戶科。吏部銓叙非才。吏科得以駁正。禮部儀制失序。禮科得以封彈。刑科論刑部審讞之乖正。工科檢工部課程之勤怠。至於五府軍需簿額。填委之多。將帥偏裨。選換之別。經歷首領。得以稽考。糾察之使。大小相維。輕重相制。威權不假。國是難搖。有道揆法守之風。無悖義犯刑之過。以成我聖祖神宗之志。而保治安於無窮。非作聰明亂舊章。而以鉗天下之議也。繼今而我子孫。當知法式一定。恪宜持循。勿恃一己之聰明。妄擬先朝。而改作顛覆典刑。以陷于不孝之地。爲之臣輔。亦當恪守常憲。永弼乃后。俾紹前烈。其永無愆。敢有妄引前制。妄議一官易一職。委是奸逆之臣。紊亂成憲。棄市不憐。家屬發去邊遠。以明爲臣不忠之罪。庶幾萬世之後。知夫創制立法之意。有在矣。

嘉宗陽德三年。訓戒百官職司。令曰。宰相之職。在乎進賢退不肖。保舉衆職。當量材授官。度德定位。使卿大夫各當其任。不得以私心自用。蔽賢縱奸。違者許臺官糾劾。吏部之職。在乎權衡人才。銓考司職。當察言行觀器。職可爲京官者。除京官。堪爲守令者。除守令。不可徇私取舍。外任有闕。二司備呈。卽速擇銓。毋得稽緩。限三月內。如法違者。許臺官糾劾。刑部覆視之官。如見重囚。付下覆議。公同審讞。務以得情爲本。不得稽滯逾期。其預得贖者。許寔納贖錢方聽。若輕者放赦。限三月以裡。違者許刑科責刷糾舉。御史耳目之官。所以振紀綱。警風采。凡宰執有過。百司違法。時政有關。並許糾劾。陳言。其詞訟已經鎮司憲司。該道等衙門。方得勘行。使詞訟至此而止。提刑監察御史。職專諍論。審讞案問。糾劾察錄。照刷等事。兼許彈劾百官。條陳時政。不得緘默。各道監察御史。乃彈劾之責。如見